

四書地理考

四書地理攷卷三

東洞庭王塗

原名仲塗

亮生著

地名類

京

京在今西安府治長安縣○詩地里攷云郡縣志周武王宮卽鎬京也在京兆府長安縣西北十八里自漢武帝穿昆明池於此鎬京遺址淪陷焉括地志瀉水源出長安縣西北瀉池水經注云瀉水承瀉池北流入渭又云渭水東北與鄠水合朱氏曰裸將于京周之京師也曰嬪于京依其在京周京也王配于京鎬京也乃觀于京高邱也○陸氏嵩曰周之京師乃雒邑卽王城對鎬京而言謂之東都

鎬京西都也武王雖革殷命實未遷都所謂南望三塗北望嶽鄙顧瞻有河粵瞻洛伊毋遠天室者周公營之未就逮後成王復使召公營之史記召公營維邑周公復卜申視卒營築居九鼎焉是也然成王亦仍居鎬京至平王東遷乃居于此春秋所書京師則指維邑祿將于京之京當仍指鎬京爲是

北海之濱

北海之濱在今永平府昌黎縣○釋地云前漢遼西郡令支縣有孤竹城括地志孤竹故城在盧龍縣南十二里今永平府治河入海從右碣石正古之北海在今昌黎縣西北亦是當其國都不遠通志以居北海爲濊縣誤○塗按

一統志夷齊廟在昌樂縣孤山齊乘言宋時因孟子言居北海之濱因立廟非也

東海之濱

東海之濱在今沂州府日照縣○釋地云後漢瑯邪國海曲縣劉昭引博物記注云太公呂望所出今有東呂鄉又釣于棘津其浦今存又於清河國廣川縣棘津辨其當在瑯琊海曲余謂海曲通典稱在莒縣東則太公避紂居東海之濱卽是其家漢崔瑗以爲汲縣人者誤○一統志東呂鄉在日照縣東舊志有太公臺臺在縣東北二十里去海里許舊址尙存臺旁溪水清漣卽太公垂釣處又云棘津河在諸城縣東南二十里○查氏揆曰太公避紂避是

避世之避謂伏處不出非避地也故呂氏春秋首時篇太公望東夷之士也史記太公望東海上人皆本孟子而呂覽高誘注以爲河內人未知所據水經注以及郡有太公泉及廟爲太公故居路史國名紀衛有棘津注冀之棗陽有棘津城有太公賣漿臺太公泉似皆其故居與游處所至非其所生當以東海海曲人爲是

諸馮

諸馮疑在今青州府諸城縣○孟子外書云舜生於姚墟禹生於石紐湯生於蒲南文王生於台疆千年一聖猶旦暮也○周氏柄中曰舜生諸馮之姚墟孫疏謂在冀州之分以史記云舜冀州之人也括地志云姚墟在濮州雷澤

縣東十三里通鑑前編云姚墟在河中府河東縣未知孰是通典謂在金州西城者非也○史記正義云會稽舊記云舜上虞人去虞三十里有姚邱卽舜所生也周處風土記曰舜東夷之人生姚邱○塗按史記正義旣曰越州餘姚縣顧野王云舜後支庶所封之地舜姚姓故云餘姚當以此記爲是又引會稽舊說及風土記殆不足據○一統志諸馮在荷澤縣南五十里相傳卽舜生處又舜井在縣東北二十五里姚墟在濮州南又云諸馮山在絳州垣曲縣東北五十里○查氏揆曰諸馮路史謂卽諸浮按左傳六卿相見於諸浮杜註晉地正義謂當在晉之近郊則諸浮亦未定所在顧景范謂絳州垣曲縣諸馮山在縣東北

四十里舜生諸馮卽此亦不足據竊謂史記言舜冀州人
帝王世紀援神契皆曰舜生姚墟世紀又曰家本冀州與
史記合則考舜之生當求之冀州其非冀州者可勿信也
尙書曰釐降二女於漉汭嬪於虞皇甫謐曰堯以二女妻
舜封之於虞今河東太陽山西虞地路史舜之先國於虞
始爲虞氏系出虞幕按四岳之薦已稱虞舜明非舜所封
自幕至于瞽瞍世居於虞矣稽古錄虞今河中府虞鄉縣
嬀水之汭舜所居也皇甫謐曰嬀水在河東虞鄉縣歷山
西西流至蒲坂縣南入于河舜居其旁水經注以漉汭爲
二水而孔安國馬季長王肅杜預皇甫謐皆以汭爲漉水
之曲是也按蒲坂今解州地蓋舜世居於虞在漉水之汭

不言姚墟者以滄汭槩之猶言姚姓之墟里在滄水之汭耳諸馮當是其地有二名此以尙書證孟子不必別爲穿鑿也或以諸馮當在濮州而通典謂在金州西城則均失也地里志漢中郡西城應劭注世本媯墟在西北舜之居郡國志成固媯虛在西北注帝王世紀亦云姚墟在西北水經漢水又東逕媯墟爲灘注引世本云舜居滄汭在漢中西城縣此與杜佑皆襲應劭李賢之誤金州西城今漢中府西鄉縣也距冀州爲遠詎足信耶若濮州之謬則始於應劭謂與雷澤相近而隋乃以雷夏澤爲雷澤縣樂史謂其地有歷山姚墟其實非也惟負夏則在濮陽耳○趙氏佑曰趙注諸馮負夏鳴條皆地名負海也在東方夷服

之地也負海者明其地之負海也考負夏衛地見檀弓注
鳴條見書序史記則曰舜冀州之人也古冀州直北位非
東且亦未嘗近海惟青徐揚三州禹貢並言海而徐揚之
海在東南惟青居大東海在其北故郡稱北海海在北如
負之者今青州府有諸城縣大海環其東北說者以爲卽
春秋書城諸者其地有馮山馮村蓋相傳自古竊疑近是
凡言人地以所生爲斷遷卒皆在後孟子亦據舜生而言
東也由此以推則知歷山雷澤河濱與夫負夏壽邱潁邱
之皆東土班班可考若河東之虞蓋本舜祖虞幕之封故
書稱虞舜史言冀州猶後人稱祖籍標郡望耳然自漢以
來皆專主河東於是諸馮湮經意隱矣

負夏

負夏在今大名府開州○周氏柄中曰檀弓曾子弔於負夏鄭注衛地史記舜就時負夏書大傳曰販于頓邱就時負夏則遷負夏乃舜貿易時事孫疏直言遷居非也○水經注泗水條云瑕邱魯邑春秋之負夏哀七年季康子伐邾囚諸負瑕是也○大事表曰杜注負瑕魯邑高平南平陽縣西北有瑕邱城在今滋陽縣西二十五里○一統志瑕邱在開州東南十八里義井里寰宇記瑕邱在濮陽縣東南三十里高三丈○路史曰世紀云舜遷於負黍按少室一曰黍室負黍在其南定六年之負黍也杜云陽城西南有負黍亭今在登封○查氏揆曰釋名夏假也假又通

瑕史記鄭世家傳瑕索隱作甫假魏世家魏王假列女傳
作瑕後漢馮異傳封陽夏侯夏音榘禮記夏楚讀若假檀
弓公肩假師古曰卽公肩假故負夏卽爲瑕邱也瑕邱有
二公叔文子升於瑕邱衛之瑕邱也季康子囚邾子於負
瑕魯之瑕邱也酈元注水經以爲魯衛雖殊土則一也誤
甚鄭元注負夏衛地則衛之瑕邱是路史國名紀謂在濮
陽東南三十里也唯酈注以魯瑕邱爲公叔之所升而路
史又以衛瑕邱爲邾子所囚則交相悖矣尸子就時負夏
販於頓邱帝王世紀始遷於負夏販於頓邱疑爲重文蓋
頓邱負夏皆在濮也又耕漁陶販舜無不爲然孟子於舜
之生卒鄭重言之而中間僅舉其負販之地于義未安按

尸子與呂覽貴因篇皆曰舜一徙成邑再徙成都三徙成國以此訓遷庶爲得之○趙氏一清曰衛瑕邱在今開州東南三十里秦置濮陽郡卽衛之帝邱成公自楚邱遷來者也

鳴條

鳴條疑在今開封府陳留縣○地里今釋鳴條岡在安邑縣北三十里接夏縣界○括地志曰高涯原出蒲州安邑縣北三十里南坂口卽古鳴條陌也鳴條戰地在安邑西○史記云南巡守崩於蒼梧之野葬於江南九疑是爲零陵集解云皇覽曰舜冢在零陵營浦縣其山九谿皆相似故曰九疑傳曰舜葬蒼梧象爲之耕山海經曰蒼梧山帝

舜葬于陽丹朱葬于陰○路史曰鳴條在河中府安邑或云陳留平邱有鳴條亭然湯伐桀與三朶昆吾同時三朶在定陶鳴條義不得在陳留又安邑有昆吾亭顯其非是也○焦氏循曰書序云伊尹相湯伐桀升自陬遂與桀戰於鳴條之野作湯誓夏師敗績湯遂從之伐三朶後漢書郡國志濟陰郡定陶縣有三朶亭三朶卽三朶由鳴條遂伐三朶則鳴條當亦不遠其所在則未詳也鄭康成以爲南夷地名蓋檀弓謂舜葬於蒼梧之野而孟子卒于鳴條又呂氏春秋簡選篇言殷湯登自鳴條乃入巢門淮南子云困桀鳴條擒之焦門又云整兵鳴條困夏南巢譙以其逼放之歷山南巢卽焦門在今江南巢縣均與鳴條貫故

鄭意鳴條之在南也呂氏春秋曰舜葬於紀市註云傳曰
舜葬蒼梧九疑之山此云於紀市九疑山下亦有紀邑○
畢氏沅曰墨子云舜葬南邑之市御覽引作南紀引尸子
作南已案路史注紀卽冀故紀后爲冀后今河東皮氏東
北有冀亭冀子國也鳴條在安邑西北其地相近記謂舜
葬蒼梧皇覽謂在零陵營浦縣尤失之梁伯子云困學紀
聞引薛氏言蒼梧在海州界近莒之紀城亦非閻百詩曰
海州蒼梧山卽山海經之郁山無舜葬於此之說○一統
志曰隋書志東海縣有鬱林山寰宇記謂之蒼梧山在東
海縣東北二里○震澤長語曰何孟春注家語陳留縣平
邱有鳴條亭海州東海縣有蒼梧山去鳴條不遠○塗按

路史雖駁鳴條在陳留之說然陳留去定陶不遠說似可從

畢郢

畢郢在今西安府咸陽縣西北○括地志曰文王墓在雍州萬年縣西南二十八里畢原上武王墓在萬年縣西南二十八里畢原上周公墓在雍州咸陽縣北十三里畢原上又曰安陵故城在咸陽縣東二十一里周之程也○畢氏沅曰孫宣公孟子音義郢音程亦作程高注呂覽畢程畢豐蓋以豐卽程也畢豐皆在咸陽案周書大匡解維周王宅程三年孔晁注云程地名在岐州左右後以爲國初王季之子文王因焉而遭饑饉乃徙豐焉是豐程不得爲

一地雍錄云豐在鄠縣程在咸陽東北○汪氏中曰趙注止云畢郢地名僞疏則云郢楚都在南郡此固邈不相涉按周書史記解畢程氏以亡呂氏春秋武王常窮于畢程矣周書王季宅程又曰文王在程作程寤程典召南譜正義云程亦在岐是周地之小別然則郢程程止一地形聲小異耳○塗按詩地理攷引皇甫謐云豐在京兆府鄠縣東豐水之西文王自程徙此又引孔氏云從鮮原徙豐豐在岐山東南三百餘里則程卽鮮原畢豐不得爲一地畢程則得爲一地矣○劉氏台拱曰漢書地理志右扶風安陵關駟以爲本周之程邑括地志云安陵故城在雍州咸陽縣東二十一里周之程邑也此邑中之地爲程其西有

畢陌一名畢原皇甫謐所謂安陵西畢陌元和志畢原卽
咸陽所理也原南北數十里東西二三百里亦謂之畢陌
此邑外之地謂畢也畢者程地之大名程者畢中之號杜
佑曰王季都畢通國內言之春秋傳魏駘芮岐畢吾西土
也注言在夏世以后稷功受此五國爲西土之長是則岐
也畢也皆古之建國也周者太王所邑而岐之小別也故
係岐言之曰岐周程者王季所邑而畢之小別也故係畢
而言之曰畢郢又據畢地有二其一文王墓也太史公曰
畢在鎬東南杜中皇覽周文王武王冢在京兆長安縣鎬
京聚東杜中而括地志以爲在雍州萬年縣西南二十八
里畢原上則唐亦謂之畢原是故有咸陽縣之畢原所謂

卒於畢郢也有萬年縣之畢原所謂文王葬於畢也一在渭北一在渭南異所同名往往相亂杜佑言畢初王季都之後畢公封焉此言在渭北者當矣而以爲文王所葬則失之帝王世紀云文武葬於畢畢在杜南晉書地道記亦云畢在杜南與畢陌別此則文武所葬不在畢陌明矣是以裴駢辨之云皇覽曰秦武王冢在扶風安陵縣西北畢陌中大冢是也人亦爲周文王冢非也周文王冢在杜中

幽州

幽州在今順天府密雲縣東北塞外地○釋地云此幽州其地狹及後肇十二州分冀州東北地爲幽州其地廣孔疏云流四凶時未作十二州無幽州之名而云幽州者史

據後定言之也非是當流其工時此地已名幽州括地志云故龔城在檀州燕樂縣界今密雲縣○史記堯本紀作流其工于幽陵莊子在宥篇作流其工于幽都○書鄭注云北裔之地○樊氏廷枚曰爾雅釋地燕曰幽州以昭余祁爲數而北據易水是殷之幽兼周之弁也周官職方氏東北曰幽州以醫無閭爲鎮而南至淄水是周之幽兼殷之營也舜典分冀爲幽禹貢復省幽入冀

南河之南

南河之南當在今歸德府虞城縣○周氏柄中曰集註南河在冀州之南則豫州也史記集解引劉熙孟子注以南河九河之最南者案九河鬲津最南鬲津在鬲縣今濟南

府德州有鬲縣故城則舜避朱在兗州也張守節謂濮州
鄆城縣偃朱故城卽舜避朱之處濮州今屬山東曹州府
亦古兗州地但豫河爲南河見於禹貢以九河之最南者
爲南河則書傳無此稱也○姚氏鼐曰舜耕歷山漁雷澤
作什器陶邱販於頓邱就時負夏此皆曹濮衛地在南河
之南然則避堯子于南河之南者舜國也旣而不得終於
諸侯于是都蒲坂舜始居衛濮也孟子謂之東夷自東夷
而蒲坂故孟子謂之中國舜避堯之子自平陽而東南至
南河逾河而至於衛濮而堯子在平陽爲國君而守宗祀
如舜不更建都邑則無都矣是以之蒲坂也武王勝殷猶
不取紂之故都以畀武庚居焉況其在舜乎惟禹亦然鄭

康成注尙書大傳謂負夏衛地是也而云歷山在河東則非也曾子固以爲指歷城南山其相去猶遠按春申君說秦王曰割濮歷之北元和郡縣志雷澤縣西北歷山舜所耕此則與其漁陶類相次疑近是矣又其地西去梁國虞縣不遠故舜居也書所謂嬪于虞者也若河東之有虞城蓋有虞氏既都蒲坂之後而名之耳舜居深山之中固兗州之歷山也徙而城都者梁國之虞縣也皆南河之南也媯汭不能言其處然宜亦在兗豫之間皇甫謐乃因虞城而附會謂瀉在河東此何據耶吾謂虞思之國蓋在河東之虞城以其承商均以來之故都且羿方強盛滅相于濮陽少康必遠避之以居河東奈何後儒反以梁國之虞爲

虞思之國而河東之虞反爲舜未爲天子之故都哉○塗
按河東虞城在今蒲州府虞鄉縣

陽城

陽城在今河南府登封縣○釋地曰陽城山名趙注云陽
城箕山之陰皆嵩山下深谷中可藏處也案漢潁川有陽
城縣以有陽城山得名洧水所出唐武后改曰告成後又
曰陽邑五代周省入登封故此山在今登封縣北三十八
里去嵩山幾三十里安得卽云嵩山下之深谷歟○劉熙
注云陽城今潁川陽城

桐

桐在今河南府偃師縣○釋地云後漢志梁國虞縣有空桐

地有桐地有桐亭太甲放處應在此今歸德府虞城縣距湯都南毫僅七十里人言湯毫爲偃師偃師去虞城八百余里尹豈能分身以應乎湯都仍屬穀熟鎮爲是○宋氏翔鳳曰間說非也史記伊尹放之于桐宮集解引鄭元曰有王離宮焉正義引地道紀云尸鄉南有毫坂東有城太甲所放處也此尸鄉正在偃師不必以空桐桐宮同字遂附會在虞城也○塗按寰宇記于解州聞喜縣云桐鄉故城在縣西南八里俗以此城爲伊尹放太甲處今按放太甲處爲尸鄉在偃師界非聞喜也又於絳州曲沃縣云桐鄉城在縣西南放太甲於桐是此地誤矣

垂棘

垂棘疑在今澤州府治鳳臺縣○澤州府志云垂棘在府治東北三十里高都村古晉城縣遺址也村南垂棘洞在焉內有石堅而潤瑩澤而光潔又東漢志高都博物記云縣南地名垺垂垂棘之壁出此○周氏柄中曰高都之垂不名垂棘漢志亦不言產玉恐屬附會

屈產

屈產當在今汾州府石樓縣○周氏柄中曰漢書地理志河東郡北屈縣師古注即晉公子夷吾所居劉昭後漢志注杜佑通典並云晉有屈產之乘即此樂史寰宇記晉石樓有屈產泉相傳昔有日馬母飲茲泉生得龍駒晉屈產之乘蓋此地所生良馬也案據劉杜說則屈地所產之馬

今山西平陽府吉州是據樂史說則是地名在今汾州府石樓縣閭百詩謂石樓乃漢西河土軍縣非北屈也斥樂史爲附會然趙岐何休並云屈產地名則樂史亦自有本也○地里攷實云杜注二屈今平陽北屈縣或云二當爲北彙纂云今平陽府吉州東北二十一里有北屈故城按韋昭曰屈有南北今河東有北屈則是時復有南屈水經注引汲郡古文曰翟章救鄭次于南屈路史國名紀隰州有故屈城南屈也隰之吉縣北二十一里有故屈城卽北屈也○塗按水經河水又南過土軍縣西酈注云縣有龍泉出城東南道左山下牧馬川川上多產名駒駿同滇池天馬則其說久矣

石邱

石邱未詳○孫疏云宋地名○蓋按石邱或以爲在今衛輝府汲縣明一統志云石邱在衛輝府胙城縣東北三十里相傳漢成帝時星隕之石據此則不可以當孟子之石邱矣

河西

河西在今衛輝府淇縣○釋地云趙注淇水名衛詩竹竿篇泉源在左淇水在右碩人篇河水洋洋北流活活衛地濱于河淇水在北流河之西故曰處淇而河西善謳○樊氏廷枚曰史記衛居河淇間故商墟案卽古朝歌城淇水逕其西河水逕其東是爲河淇之間

高唐

高唐在今濟南府禹城縣北○大事表云襄十九年風沙衛入於高唐以叛二十五年祝佗父祭於高唐有齊別廟蓋齊之宗邑也穆孟姬爲陳氏請之陳氏始大故城在今濟南府禹城縣北四十里

南陽

南陽在今泰安兗州二府境○周柄中曰戰國時有三南陽一屬韓卽今南陽府是也一屬魏今懷慶府修武縣是也此南陽地屬齊趙注山南曰陽岱山之南謂之南陽也釋地云史稱泰山之陽則魯其陰則齊南陽屬齊必齊之地深插入魯界中者案公羊傳齊桓使高子將南陽之甲

立僖公以城魯注齊下邑史記楚攻齊之南陽索隱云齊
淮北泗上地皆是實指其地竊疑南陽是總名如晉合溫
原欒茅之地俱謂之南陽不得指以一處全謝山曰南陽
卽汶陽山南曰陽是南陽所以得名也水北曰陽是汶陽
所以得名也案左傳鄆讎龜陰陽關皆齊魯接境地通謂
之汶陽之田在泰山之西南汶水之北汶陽卽南陽全說
是也○大事表曰定十年齊人歸三邑汶陽邑在今兗
州府寧陽縣境又杜注泰山博縣北有龜山案博縣爲今
之泰安府龜山在新泰縣之西南泗水縣之東北與泰安
縣接境○姚氏鼐曰泰山之南汶水之北曰南陽大行之
南南河之北曰南陽太室之南漢水之北曰南陽古者泰

山之陽則魯其陰則齊也南陽者魯地也自春秋以來齊侵魯而有之齊南境包泰山外矣武王封周公於魯方百里也成王益啟伯禽之宇至方四百里故太史公封伯禽康叔于魯衛各四百里其後北爲齊侵南爲楚侵魯之削也滋甚魯餘方百里者五開方之得方二百三十里有奇視其封于成王時四百里之地削過半矣然于周公始封百里猶贏五分之四也○全氏祖望曰南陽卽汶陽蓋汶水出泰山郡之萊蕪縣西南過贏縣桓三年公會齊侯于贏者也又西南過牟縣牟故魯之附庸也又東南流逕泰山又東南流逕龜陰之田卽左氏定十年所歸也又東南流逕明堂又西南流逕祖徠山又南流逕陽關卽襄十年

逆臧孫之地又南逕博縣卽哀十一年會吳使博者也又南逕龍鄉卽成二年圍龍者也又南逕梁父縣之菟裘城隱十一年所營也又西南過剛縣漢之剛乃春秋之間其西南則汶陽之田又西南則棘成三年所圍也又西南爲蓬莊十三年齊所滅也又西南爲讎桓三年齊侯送姜氏之地也又西南爲邱則叔孫氏邑又西南爲平陸按鄆讎龜陰陽關皆齊魯接境地通而言之皆汶陽之田也

葵邱

葵邱疑在今歸德府考城縣東三十里○僖九年會於葵邱杜注宋地陳留外黃縣東有葵邱○地里攷實曰彙纂云據後漢志西安縣有蓮邱里亦名渠邱卽古葵邱也今

青州府臨淄西三十里有西安故城葵邱在其處今按水經注西安縣之渠邱時水所逕齊西之葵邱系水所逕則是二地京相璠曰葵邱在臨淄西五十里若渠邱在西安者齊大夫雍廩邑昭十一年傳齊渠邱實殺無知杜注齊國西安縣有渠邱則合渠邱葵邱爲一非也○全氏祖望曰杜預以爲葵邱若是汾陰則晉乃地主夏會秋盟豈有不豫之理然宰孔明言西略而以爲陳留是仍東略也則宜在汾陰蓋當時不服桓公者楚而晉實次之故桓公特爲會于晉地以致之亦霸者之用心也至于晉侯已經赴會以宰孔之言而還而是歲獻公卒桓公爲之討亂置君則宰孔以爲不復西略者其言虛矣○括地志云葵邱在

曹州考城縣東南一里一百五十步郭內卽桓公所會處也○水經注河水篇云汾水西徑鄆邱北故漢氏之方澤也賈逵云漢法三年祭地汾陰方澤澤中有方邱故謂之方澤邱卽鄆邱也許氏說文稱從邑癸聲河東臨汾地名矣又泗水篇云黃溝自城南東逕葵邱下齊桓公合諸侯于葵邱卽此地也又淄水篇云系水又西逕葵邱北襄公使連稱管至父戍葵邱京相璠曰齊西五十里有葵邱地若是無庸戍之引河東汾陰葵邱山陽西北葵城宜在此非也余原左傳連稱合無寵之妹候公子宮因無知之絀遂害襄公若出遠無代寧能謀及婦人而爲公室之亂乎又漳水篇云春秋古地云葵丘地名今鄆西三臺是也○

塗按葵邱有四俱見水經注河東郊邱似名從漢起非齊桓會處鄴縣之葵邱春秋時屬衛後入晉管子所謂築五鹿中牟鄴者也今彰德府臨漳縣也考城既非西略汾陰又不宜晉不與則在鄴地似爲近之又水經注清水篇引京相璠曰河內山陽有郛城按山陽今之修武縣此地名鄴無葵邱之目京相璠疑爲連稱戊地非也

范

范在今曹州府北百六十里之范縣○釋地云今東昌府濮州范縣本春秋晉大夫士會邑又半屬魯後漢志東郡范縣有秦亭卽莊三十一年築臺于秦地道記在縣西北是也孟子時則屬齊○施氏彥士曰孟子書有兩之齊其

一由平陸之齊其一自范之齊夫范在平陸西二百餘里
自范者或可由平陸而由平陸則必不可經于范以地理
證之則自范之齊當在孟子五十四歲去梁時也考大梁
在今開封府齊都在今青州府臨淄縣而范則范武子故
邑爲齊西南邊邑當時惟去梁適齊故路出於范若由鄒
或山平陸當徑向東北矣何事西北至范迂廻三四百里
而後折而東北哉且孟子明云於崇吾得見王方之玃以
崇爲崇武今東昌府聊城縣有崇武驛古聊攝地也又在
范邑東北百餘里自范之齊或值齊王行邊至崇得見未
可知也○江慎修曰士會所食之范當在山西平陽府境
與濮州東北六十里之范縣無涉○大事表曰山東濮州

范縣爲晉范武子封邑世多疑之以晉當春秋中葉不應拓土至此季氏私考遂以爲隨之別名此甚非也余嘗攷之武子之封范蓋自宣十五年晉人滅潞之後始也案宣十二年邲之戰稱隨武子十五年荀林父滅潞十六年士會滅甲氏留吁晉侯請于王命爲太傅王享之其時止稱武子而不稱隨十七年請老遂稱范武子以後世稱范意范爲赤狄潞氏地晉滅其族而因以爲武子賞功之邑耳何則滅潞之役士會荀林父二人同功荀林父賞狄臣于室士伯諫不殺林父猶予以瓜衍之縣士會滅甲氏留吁豈獨無賞傳但載其將中軍爲大傅而偶遺其封邑耳其范之爲狄地何也春秋時狄之疆域甚遠伐邢而邢遷夷

儀攘邢之故地入衛而衛遷楚邱處衛之故墟其後屢侵齊魯曹濮之境狄地實相犬牙而晉獻之世以蒲屈爲邊宋蒲屈爲今平陽府隰吉二州之境自此以東皆狄地故曰狄之廣莫狄之東爲衛衛之東爲齊故其時晉之與齊甚遼遠齊桓會盟無由至文襄之世猶隔絕文公伐曹必假道於衛是則未滅潞氏以前晉決無由得范地既滅潞氏二年而武子遂封范中間不聞別侵齊魯故知范爲狄之故地無疑當是時楚方強橫服鄭伐宋晉概置不問而卻缺士會專致力於狄以爲爭無益之虛名不如爲拓土之實計故求成以攜其黨滅留吁甲氏以盡其族自是以後衛之故封如河內朝歌邯鄲百泉之地悉爲晉邑幾有

中原大半與齊魯衛三國爲鄰境鞏之戰遂卷甲而長驅入齊染後東昌之冠縣爲晉冠氏邑邱縣爲晉乾侯邑而齊烏餘以廩邱入晉廩邱亦范境此皆宣公以後之晉非宣公以前之晉也

棠

棠在今萊州府卽墨縣南○大事表云春秋棠有四隱公五年公觀魚於棠魯濟上之邑在今兗州府魚臺縣東北十二里又襄二十五年齊棠公尙杜注齊棠邑大夫今爲東昌府之堂邑縣又襄十四年楚子蘭師于棠以伐吳今爲江南江寧府之六合縣又襄六年滅萊萊共公奔棠杜注棠萊邑今膠州卽墨縣南八十里有甘棠社襄十八年

齊侯將走郵棠卽此○顧炎武山東攷古錄云當時卽墨
爲齊大都倉廩在焉故發棠卽萊邑也○一統志棠鄉在
平度州東南甘棠社在昌邑縣南八十里

四書地理攷卷四

東洞庭王塗

原文仲塗

國名類

殷

殷始都于商在今商州○地理攷實曰八遷契始居商一
也昭明居砥石二也相土居商邱三也冥離商邱奉命治
河四也子哀遷殷五也孔甲復歸商六也湯自商邱遷亳
七也自穀熟遷偃師八也仲丁遷囂河亶甲遷相祖乙遷
囂自囂遷庇南庚遷奄盤庚自奄遷北蒙○釋地曰湯居
南亳以後紂居朝歌以前凡六百四十五年都河南者三
都河北者四三者何一括地志云南亳故城在宋州穀熟

縣西南三十五里卽湯所都一滎陽故城在鄭州滎澤縣西南十七里殷時敖地卽仲丁所遷一亳邑故城在洛州偃師縣西四十四里卽盤庚所遷四者何一故殷城在相州內黃縣東南十三里卽河亶甲所築而都者一耿城故耿國在絳州龍門縣東南十二里祖乙時圯自祖乙前已爲都矣一邢國故城在邢州外城內西南角卽祖乙所遷一朝歌故城在衛州東北七十三里本妹邑或曰武乙遷焉或曰武丁始都此○梁氏玉繩曰自契至湯八遷本記止言湯之一遷餘皆不載攷書疏曰世本昭明居砥石荀子昭明居砥石遷于商左傳相土居商邱是三遷也竹書帝芒三十三年商侯遷于殷

冥之子振也

帝孔甲九年殷侯復

歸商邱

不知何世

是五遷也路史國名記云上甲居鄴是六遷

也而水經注又引世本云契居蕃是七遷也并湯爲八釋文謂八遷惟見四孔仲達數砥石商邱及亳爲三而連契之居商爲四遷非也又曰五遷無定處僞孔傳以湯徙亳仲丁囂河亶甲相祖乙耿并盤庚居殷爲五馬鄭王肅以商亳囂相耿爲五兩者皆非上文云自契至湯八遷則不應通數成湯明甚而盤庚當作誥之時尙未徙殷尤不應列于五遷內矣考竹書仲丁元年遷囂河亶甲元年遷相祖乙元年遷耿二年圮于耿遷庇南庚三年遷奄是之謂五遷紀于前之八遷書其一而遺其七於後之五遷書其三而失其二豈非疎乎盤庚至紂都復數徙史亦不盡書

也又祖乙自相徙耿自耿徙庇書序專言篇名故但云祖乙圮于耿作祖乙而不及相圮遷耿事祖乙之篇正作于遷庇時故云圮于耿不云遷于耿也僞孔傳誤連上文遂改爲圮于相遷于耿孔疏謂孔傳與經言大不辭亦頗糾爲傳之失乃復引康成說祖乙去相居耿爲水所毀於是修德以禦之因不再徙而又誤讀竹書以爲祖乙圮耿遷奄並非○塗按盤庚所遷之殷或以爲北蒙或以爲偃師按書盤庚之誥言適于山當以偃師爲是

夏

夏都于陽翟在今開封府禹州後徙安邑在今解州安邑縣○姚氏熊曰世本曰禹居陽城蓋在嵩山下嵩山古曰

崇山故禹國曰崇國旣而不得終于諸侯于是都陽翟漢志陽翟禹所居啟有鈞臺之享鈞臺在陽翟帝發至桀其間乃遷河東安邑故桀之國左河濟右太華伊闕在南羊腸在北臣瓚謂桀都河南其說誤矣地理志北海郡平壽應邵曰故斗尋禹後今斗城是也臣瓚曰斗尋在河南不在此也汲郡古文云太康居斗尋亦居之桀亦居之吳起對魏武侯曰昔夏桀之居左河濟右太華伊闕在其南羊腸在其北河南城爲值之又周書度邑篇曰武王問太公曰我將因有夏之居南望過于三塗北望瞻于有河卽河南是也

周

周在今西安府長安縣成周在今河南府洛陽縣○地理攷實曰文王都豐今西安府鄠縣南有鄠城武王都鎬鎬在豐水之東豐在豐水之西相去二十五里平王遷都王城今洛陽縣西河南故城是也敬王又遷成周今洛陽縣東洛陽故城是也按王城漢河南縣卽郊鄠敬王徙都成周卽郊邑其故城在今洛陽東北二十里二城相去四十里○大事表曰今河南洛陽縣城內西偏卽王城故址周公營洛邑澗水東瀍水西南繫乎洛水北因乎邙山自平王東遷至景王十一世皆居此敬王遷成周王城廢至赧王復居之○攷實又曰周考王封其弟揭於王城是爲周桓公傳之威公惠公武公文君秦滅之遷於惡狐是爲西

周西周惠公別封少子班于鞏以奉王于成周漢文論爲惠公傳之其子傑秦復滅之遷于陽人聚是爲東周二公封邑之殊又于洛邑二城內以王城爲西周對成周爲東周也○大事表曰東遷後王畿疆域尙有今河南懷慶二府之地兼得汝州跨河南北有號國桃林之隘以呼吸西京有申呂南陽之地以控扼南服又名山大澤不以封虎牢峭阻俱在王略襟山帶河晉鄭夾輔光武創業之規模不是過也平桓莊惠相繼百年號令不行諸侯攘竊王不能張皇六師更復披析其地以爲賞功酒泉賜虢虎牢賜鄭至允姓之戎入居伊川晉滅虢而鎬京之消息中斷楚滅申而南國之窺伺方張至溫原蘇忿生之田與鄭復以

賜晉則舉大河以北委而棄之由是懷慶所屬七縣原武屬鄭濟源修武孟縣溫縣屬晉王所有者河內武陟二縣及河南府之洛陽偃師鞏縣嵩縣登封新安宜陽孟津八縣汝州之伊陽魯山許州府之臨潁縣與鄭接壤而已○地理志云今之河南雒陽穀城平陰偃師鞏緄氏是其分也又曰初雒邑與宗周通封畿東西長而南北短短長相覆爲千里至襄王以河內賜晉文公又爲諸侯所侵故其分墜小

杞

杞都于雍邱今開封府杞縣後遷淳于今青州府安邱縣○地理攷實曰杜注杞國本都陳留雍邱縣推尋事跡桓

六年淳于公亡國杞似并之遷都淳于僖十四年又遷緣陵襄二十九年晉人城杞之淳于彙纂云雍邱今開封府杞縣淳于今青州府安邱縣東北三十里有淳于故城今按史記索隱云周封杞居雍邱至春秋時杞已遷東國故隱四年莒人伐杞取牟婁牟婁者東邑也據此則春秋之前已遷青州而近莒矣青州去雍邱甚遠杞得國於此或由周王改封之疏謂雍邱淳于郡別而境連者大誤○大事表曰緣陵在今青州府昌樂縣亦曰營陵路通登萊今縣東南三十里有營陵故城

宋

宋都于商邱在今歸德府治商邱縣○地里攷實曰疏云

武庚作亂周公伐而誅之更封紂兄微子啟爲宋公都商邱今梁國睢陽縣是也彙纂云今河南歸德府治商邱縣卽漢睢陽故城在縣南○大事表曰昭八年魯蒐于紅自根牟至于商衛釋例云商宋一地是也今城西南有商邱周三百步世稱闕臺○地名攷略曰孔穎達云微子初封于宋不知何爵此時因舊宋命之爲公令爲湯後蓋向第封之而已以有武庚爲嫡屬故未爲湯後至是始主湯祀也殷本紀契生昭明昭明生相土相土契孫也相土居商邱則商邱本殷舊都武王因以封微子耳襄十年宋公享晉侯于楚邱請以桑林桑林者宋人享祖廟之樂也書傳言湯禱于桑林之社而雨昭二十一年宋城舊鄆及桑林

之門可見桑林卽在商邱之境矣廟社所在非舊都而何
又按服虔云相土居商邱故湯以爲號誤也詩天命元鳥
降而生商鄭康成曰商國在太華之陽皇甫謐曰今上洛
商縣是也孔穎達曰若契之居商卽是商邱不得云相土
因闕伯若別有商地則湯之爲商不是因相土矣○大事
表曰宋在春秋兼有六國之地宿偃陽曹其見于經者也
杞戴及彭城則經傳皆不詳其入宋之年而地實兼併于
宋其封域全有河南歸德府一州八縣之地開封府之杞
縣封邱縣有宋之長邱蘭陽縣有宋之戶牖衛輝府之滑
縣有宋之城鉏陳州府治之淮寧縣有宋之西華縣有
宋之鬼閭地又江南徐州府之銅山縣沛縣蕭縣潁州府之

太和縣山東兗州府之金鄉縣嶧縣泰安府之東平州後
減曹又得曹州府之曹縣荷澤縣定陶縣○又曰自三監
作孽武庚反叛周公誅武庚而封微子於宋豈非懲創當
日武庚國于紂都有孟門太行之險其民易煽其地易震
而商邱爲四望平坦之地又近東都日後雖子孫自作不
靖無能據險爲患哉故殷之遺民屬之懿親康叔而杞宋
接壤俱在開歸匪特制馭亦善全先代之後宜爾也入春
秋時宋乃有彭城彭城俗勁悍又當南北之衝故終春秋
之世宋最喜事齊與則首附齊晉與則首附晉悼公之再
伯也用吳以犄楚先用宋以犄吳實于彭城取道楚之拔
彭城以封魚石也非以助亂實欲塞夷庚使吳晉隔不得

通也晉之滅偏陽以畀宋也非以德宋欲宋爲地主通吳
晉往來之道也蓋彭城爲宋有而粗爲楚地偏陽爲楚與
國皆在今沛縣境如喉嚨中之有物宋有偏陽而吳晉相
援如左右手矣故當日楚最仇宋常合鄭以鹵宋亦最力
追悼公已服鄭不復恃吳吳闔廬之世力足以制楚不復
專賴晉而宋于是晏然無事是彭城之係于南北之故者
匪小而宋常爲天下輕重者以其有彭城也自後吳日強
橫齊魯俱被其毒害而宋始終不受兵亦以前日爲東道
主之故而黃池之役吳歸道自商魯王欲伐宋太宰嚭曰
可勝也而弗能居蓋杞宋舊封其非險阨之地久矣○地
理志云宋地今之沛梁楚山陽濟陰東平及東郡之須昌

壽張皆宋分也宋自微子二十餘世至景公滅曹滅曹後
五世亦爲齊楚魏所滅參分其地魏得其梁陳留齊得其
濟陰東平楚得其沛

陳

陳都於宛邱今在陳州府治淮寧縣○杜注今陳國陳縣
○說文云陳宛邱也舜後鳩滿之所封也○毛傳譜曰陳
者太皞虛戲氏之墟帝舜之冑有虞闕父者爲周武王陶
正武王賴其利器用與其神明之後封其子鳩滿於陳都
於宛邱之側○一統志厄臺在淮寧縣南一里許卽孔子
絕糧處又名弩臺○路史曰伏羲氏都於苑邱故陳爲太
昊之墟又曰黃帝後姬姓國有陳今鳳翔寶雞故陳倉有

陳山非宛邱

齊

齊都于營邱在今青州府臨淄縣○地理攷實曰彙纂云
太公所封國都今青州府臨淄縣西北營邱城是也後胡
公徙都薄姑則今青州府博興縣東北今按臨淄故城在
今青州府北五十里又名齊城漢書臣瓚注謂臨淄城中
有邱卽營邱故營邱與臨淄爲一也若北海郡治之營陵
臣瓚謂卽春秋之緣陵其非營邱明矣應劭以營陵爲營
邱今昌樂縣漢爲營陵地隋於此置營邱縣一統志謂昌
樂縣東南五十里營邱社卽太公所封之地又於臨淄縣
注云本齊營邱地漢置營陵縣爲北海郡治誤矣○括地

志云營邱在青州臨淄北百步外城中水經注臨淄縣城中
有邱淄水出其前經其右故有營邱之名天齊池在青
州臨淄縣東南十五里封禪書曰齊之所以爲齊者以天
齊也又曰少昊時有爽鳩氏虞夏時有季荝殷時有逢伯
陵殷末有薄姑氏爲諸侯國○漢書地理志齊郡臨淄縣
下云師尙父所封如水西北至梁鄒入沛應邵曰齊獻公
自營邱徙此臣瓚曰臨淄卽營邱晏子曰始爽鳩氏居之
逢伯陵居之太公居之又曰先君太公築營之邱今齊之
城中有邱卽營邱也師古曰瓚說是也築營之邱言於營
邱地築城邑○瑤按地理志北海郡營陵下云或曰營邱
應劭曰師尙父封于營邱陵卽邱也師古曰臨淄營陵皆

舊營邱地應說固非師古以爲兩地皆號營邱亦誤矣○
趙氏一清曰獻公徙薄姑都治臨淄見于史記齊世家應
邵說遂敗後人之疑然太公始封宜在北海史記云營邱
邊萊故萊人與之爭國襄宇記濰州昌樂縣有古營邱城
云本夏商已前故國太公所封之處明其不在臨淄也迨
獻公新造斯邑猶取故稱故臨淄亦有營邱之號而春秋
之先杞自雍邱僻處東夷魯僖十五年桓公城緣陵而遷
之棄地間田市恩鄰國以收救患分災之美霸者所爲大
率類是故營陵又有緣陵之目遂爲淳于公之都邑矣不
然東樓之裔旣非強大焉能與泱泱表海之邦爭此遐處
之土乎且瓚所引晏子對景公之語本在薄姑而移之臨

涵故知所傳之矣困學紀聞云齊世家胡公始徙都薄姑
周夷王之時獻公因徙薄姑都泊臨淄詩正義云烝民云
仲山甫徂齊傳曰古者諸侯通隘則王者遷其邑而定其
居蓋去薄姑遷于臨淄以爲宣王之時始遷臨淄與世家
異毛公在遷之前其言當有據顧祖禹曰呂氏春秋太公
封營邱之渚海阻山高險固之地其後五世胡公徙薄姑
六世獻公徙臨淄蓋自東而西也又云顧野王云班志言
臨淄名營邱此猶晉遷于新田而仍謂之絳趙遷于都而
仍謂之郢蓋因臨淄城中有小邱而因謂之營邱也○高
氏士奇曰營邱有二說諸家平之多左祖班氏營邱邊萊
之說似亦近理然均之相去甚遠也安知當日之臨淄不

邊萊乎至於呂氏春秋言海阻山高二邑皆不然未宜執此以立論又史記原云獻公率營邱人以攻胡公是獻公據舊都已久其徙薄姑都治臨淄不過遷齊國之廟社以就已復新其名曰臨淄耳若緣陵爲封祀之地哀十四年宋向魋請以鞏易亳公曰宗邑也不可夫以宗邑封公族且不可況異姓乎有以知其必不然矣皇覽曰呂尚冢在臨淄城南十里此亦可爲一證蒲姑城在今青州府博興縣○一統志臨淄故城在今臨淄縣北八里亦曰齊城自齊獻公以下皆都此○大事表曰齊在春秋兼併十國之地紀邲譚遂鄆陽萊七國之滅見於經如莒之故封介根及牟介二國俱不詳其滅之何年其疆域全有青州濟南

武定登州萊州五府之地獨青州府之安邱諸城二縣闌入莒地後入魯又東昌府之聊城爲聊攝堂邑縣爲棠邑在平縣爲重邱泰安府治與魯接境又兼有東阿肥城平陰及東平州斗入兗州府之陽穀一縣沂州府之蒙陰一縣與魯衛錯壤又曹州府之范縣爲齊廩邱及顧地則齊晉宋魯衛五國交錯處也直隸天津府之慶雲縣爲齊無棣地○又曰齊於春秋號大國然以山東全省計之兗州強半屬魯泰安與魯參半東昌晉衛錯處他如青州濟南魯地犬牙其閒齊所全有者武定登萊三府及曹沂所屬數縣而已其形勢要害不如晉幅員廣遠不如吳楚徒以東至海饒魚鹽之利西至河憑襟帶之固南至穆陵有大

國之險北至無棣收廣漠之地用管子之計官山府海遂
成富強爲五伯首豈惟地利抑亦人謀之善也然管子以
圖伯者陳氏亦用以竊國山木如市弗加於山魚鹽蜃蛤
弗加於海以國爲餌成篡奪器一也而操之者異豈非
得其人則用以興失其人則遂以亡歟○地理志齊地東
有甾川東萊琅邪高密膠東南有泰山陽北有千乘清
河以南勃海之高樂高城重合陽信西有濟南平原皆齊
分也

魯

魯國于曲阜今在兗州府曲阜縣○地理攷實曰彙纂云
括地志兗州曲阜縣外城卽伯禽所築古魯城也今按曲

阜本奄國都成王滅奄乃封魯又按明堂位言封周公于曲阜地方七百里魯頌言奄有龜蒙遂荒大東保有鳧繹遂荒徐宅則魯之封域蓋廣矣大畧計之北與齊分太山西與曹分濟水南近邾滕而西南至金鄉魚臺單縣鄰於宋東踰蒙陰抵諸城濱海東南與莒爲鄰則七百里有過之無不及也雖其間不無後世增擴然亦止能侵小豈能并大其附庸之國則任宿須句顓臾根牟鄆郛牟極鄆邾所占地固多然謂魯之實封儉于百里則魯豈止曲阜一縣乎孟子蓋爲當時諸侯土地過制者狹小言之非實錄也○塗按孟子所言自是武王初封之制明堂位所言則成王斥大土宇爲之也○又按史記越滅吳與魯泗東地

方百里則亦魯益地之事也○高氏士奇曰曲阜少皞之墟蔡墨曰少皞氏有四叔世不失職遂濟窮桑杜注窮桑少皞之號地在魯北帝王世紀少昊帝是爲元囂降居江水有聖德邑於窮桑以登帝位都于曲阜後漢志魯國卽奄國而杜預不主是說其注因商奄之民句曰商奄國名也與四國流言或迸散在魯皆令卽屬魯懷柔之按書序成王東伐淮夷遂踐奄因以封周公夫周公已封于武王時成王乃以奄地益之其非一地可知孔穎達曰奄東方之國近魯之地是矣今志言曲阜舊城卽古奄國或云奄城在縣東二里○大事表曰魯在春秋兼有九國之地極項根牟鄆邾魯所取也向須句鄆邾則邾莒滅之而魯從

而有之者也其疆域全有兗州府之曲阜寧陽泗水金鄉
魚臺汶上濟寧州嘉祥八州縣之地後兼涉滕縣鄒縣嶧
縣與邾接境又泰安府之泰安縣與齊接境兼有新泰縣
萊蕪縣沂州府治及費縣沂水縣曹州府之鄆城縣爲魯
西鄆鉅野縣爲獲麟處城武縣單縣爲高魚邑涉范縣界
又兼涉青州府之安邱諸城二縣與莒接境又河南陳州
府項城縣爲魯所滅項國地又涉江南之海州○又曰魯
平衍無高山大川爲之限隔無魚鹽之利爲之饒沃故終
春秋之世常畏齊而附晉又其西南則宋鄭衛及邾莒杞
鄆諸國地犬牙相錯時吞滅弱小以自附益祊易之鄭防
取之宋須句取之邾向鄆取之莒而邾則空其國都致邾

衆退保嶧山與莒爭鄆無寧日逮晉文分曹地則有東昌
府濮州西南而越旣滅吳與魯泗東方百里地界稍稍擴
矣然終不能抗衡齊晉豈特其君臣之孱弱亦其地當走
集以守則不足以固以攻則不足以取勝也徒以周公之
後世爲望國爲晉楚所重至戰國猶存耳地理志云東至
東海南有泗水至淮得臨淮之下相睢陵僮取慮皆魯分
也○又曰東平須昌壽張皆在濟東屬魯非宋地也當考

四書地理攷卷五

東洞庭王塗

原名仲塗

亮生著

國名類

衛

衛都于朝歌在今衛輝府淇縣○杜注衛國在汲郡朝歌
○疏曰譜云康叔居殷墟今朝歌是也文公徙居楚邱成
公徙帝邱今東郡濮陽是也○地名攷略曰杜佑云衛縣
西二十五里有古朝歌城是古朝歌與衛縣復非一地今
河南衛輝府淇縣東北有朝歌城張洽集傳以爲在淇縣
北關西社是也據漢置朝歌縣原在衛都不知徙于何年
又相州圖經安陽紂都也戰國策紂聚衆百萬左飲淇水

竭右飲洹水不流邑正在二水間相州爲今彰德府據此則康叔未嘗仍紂之都然水經注所述川渠之迹甚明當以淇縣爲是○水經注云淇水又東右合泉源水水有二源一水出朝歌城西北東南流其水南流東屈逕朝歌城南晉書地道記曰本沫邑也殷王武丁始遷居之爲殷都也紂都在禹貢冀州大陸之野卽此矣今城內有殷鹿臺紂昔自投于火處也地居河淇之間戰國時皆屬於趙○高氏士奇曰祝鮒曰封畛土略自武父以南及圃田之北竟取於有閭之士以共王職取于相土之東都以會王之東蒐聃季授土陶叔授民命以康誥而封于殷虛此衛之疆域也杜註武父衛北界圃田鄭藪澤有閭衛所受朝宿

邑蓋近京畿相土東都爲湯沐邑王東巡以助祭泰山今按圖田藪在中牟縣境有閭之士卽閭沒所爭者乃周地相土東都或以爲相州因河亶甲居相爲名非也相土爲契後六世君居商邱者其東都不知所在孔穎達曰言共王職猶魯之許田蓋近王畿會王東蒐從王巡狩猶鄭之祊田蓋近泰山也斯言諒矣○又曰開皇十六年同時置兩楚邱縣一在漢已氏縣以戎伐凡伯之楚邱爲名已氏春秋時爲戎州在晉時濟陰之城武居東濟陽之已氏居西兩相鄰並成武之西南卽已氏之東南楚邱亭漢晉屬成武而隨時或割隸于已氏故取以爲名今在曹縣東南四十里此楚邱之在南者也一在漢白馬縣卽水經註所

云者尋改名衛南杜佑通典云白馬春秋衛國漕邑衛南
衛國楚邱也元和郡縣志云隋置楚邱縣後以曹縣有楚
邱改名衛南朱子集傳云漕楚邱皆在滑州其故城在今
滑縣東六十里此楚邱之在北者也○又曰鄭箋云自河
以東夾于濟水文公將徙登漕之虛以望楚邱之旁邑及
其邱山審其高下所依乃建國焉然則楚邱與漕本爲一
地而在衛東明矣孔穎達云濟自河北而南入于河又出
而東楚邱在於其間東有河西有濟故曰夾于濟水若城
武之楚邱則在濟外不夾於河濟矣攷漢白馬縣在朝歌
東當日衛之遺民渡河野處其去國都故不當遠但知漕
邑楚邱非二地則異解息矣至于唐宋以來之曹縣即漢

之成武乃古之曹國與衛漕邑自別也○焦氏循曰漢書
地里志山陽郡成武有楚邱亭齊桓公所城遷衛文公于
此杜於隱七年之楚邱及僖二年之城楚邱並云衛邑則
固以齊之所城戎之所伐爲一地也庚戌時成武屬沛陰
不屬東郡而疑在東郡界中者蓋不以成武之楚邱爲衛

之楚邱也

見正義
引鄭志

水經注濮水枝津上承濮渠東逕鉏邱

縣南京相璠曰今濮陽城西南十五里有沮邱城六國時
沮楚同音以爲楚邱非也然則京相璠始以濮陽有楚邱
酈氏旣斥其非矣唐人作括地志乃以爲在滑州衛南縣
通典元和郡縣志皆言衛文公自漕邑遷於楚邱卽衛南
縣太平寰宇記於澶州衛南縣言楚邱城在縣西北四里

然於宋州楚邱縣又云古之戎州卽已氏之邑景山在縣北三十八里是兼兩地言之至歐陽忞言拱州楚邱非衛之所遷縣近世學者遂以楚邱爲在今滑縣西成武之楚邱在今曹縣而我所伐與齊所城竟分兩地矣余按閔公三年立戴公廬于漕僖公元年諸侯城楚邱封衛於是去曹遷楚邱十二年爲狄難諸侯城衛楚邱之郛十八年二十一年狄皆侵衛三十一年冬狄圍衛衛遷於帝邱是必帝邱可以避狄故去楚邱而遷此若楚邱在滑縣則與帝邱接壤相去不足百里狄可圍楚邱於滑獨不可圍帝邱乎必不然矣惟楚邱在成武爲衛之東南與宋魯接壤狄人出沒於此凡侵魯侵宋侵衛皆在於此帝邱西憑大河

北擁清濟地近於漕實遠於楚邱自遷之後伏乃移思於魯宋雖文公十三年乘衛侯在會亦爲患於邇不足爲衛難矣故未遷則苦之旣遷且乘狄亂侵以報之蓋狄雖無定而出沒之地亦有常處河濟之間非其所及矣襄公十年宋公享晉侯于楚邱卽此楚邱也是時晉悼公與魯衛諸君會于柤遂滅偃陽柤與偃陽俱在漢彭城國在今邳州之北自此歸國道經楚邱蓋由衛渡河時以偃陽與宋公故宋享之而道實不由宋故享於衛之楚邱不致晉侯于宋而享之者尊晉也楚邱衛之舊都城郭宮室必完美享之於此有行禮之地也○塋按水經注云河水分濟于定陶東合黃水北逕景山東又北逕楚邱西郡國志曰城

武縣有楚邱亭卽詩所謂望楚與堂景山與京也又東北
逕成武西是主城武之楚邱矣又云白馬濟有白馬城衛
文公東徙渡河都之是又主衛南矣兩說聚訟究以城武
爲是○僖三十一年衛遷于帝邱杜註今東郡濮陽縣故
帝顓頊之虛故曰帝邱○高氏士奇曰梓慎曰衛顓頊之
虛也夏爲昆吾氏所居國語曰昆吾爲夏伯今開州東二
十里有顓頊城一曰東郭城城里昆吾臺是也又左傳衛
成公夢康叔曰相奪予享卽知夏后相亦嘗居此城東南
有浚城又有寒泉詩云爰有寒泉在浚之下其後又曰濮
陽以地在濮水北也○大事表曰衛之始封兼三監之地
封域本大後再遷至帝邱而其舊封多入于晉其地有今

之直隸大名府之開州及府治元城縣魏縣長垣縣廣平府之邯鄲縣爲邯鄲邑旋入晉河南衛輝府之淇縣爲朝歌汲縣爲河內輝縣爲百泉後俱入晉滅邢有順德府邢臺縣地後亦入晉僅有滑縣之楚邱及漕地又兼涉懷慶府修武縣界有彰德府之安陽縣內黃縣林縣歸德府之睢州爲襄牛地又錯入開封府之封邱縣山東曹州府之濮州爲城濮地曹縣爲南楚邱地又錯入兗州府之陽穀縣泰安府之東阿縣地多與諸國相交錯也又曰衛地西鄰晉東接齊北走燕南拒鄭宋楚之與晉爭伯也爭鄭宋而衛不受兵以鄭宋南面爲之蔽也晉文城濮之戰楚始得曹而新昏於衛蓋欲爲遠交近攻之計結衛以折晉之

左臂使不得東向爭鄭也故晉文當日汲汲焉首事曹衛
豈惟報怨之私亦事勢有不得不爾晉欲救宋則不得不
先伐衛晉欲服鄭亦不得不先服衛衛服而鄭魯諸國從
風而靡矣蓋衛踞大河南北當齊晉鄭楚之孔道晉不欲
東則已晉欲東則衛首當其衝曹衛以北方諸侯而爲楚
之役天下幾不復知有中夏此晉之用兵所以不獲已也
自是以後衛幾同晉之鄙邑其曹濮之地與晉犬牙錯互
宣成之世屢受齊師每有齊師則乞援於晉至春秋之季
年晉鄭之大夫擅權孫林父以戚如晉晉取衛懿氏邑六
十與孫氏戚近帝邱衛都肘腋之地世爲孫氏邑自是衛
非復衛有并不爲晉有而爲晉衛大夫所營狡兔之三窟

也失其地利首受強鄰之見侵繼受叛臣之桀桀衛之爲
衛亦可哀哉

唐

唐都於平陽在今平陽府治○說文陶再成邱也在濟陰
夏書曰東至于陶邱陶邱有堯城堯嘗所居故堯號陶唐
氏○段氏玉裁曰定陶故城在今曹州府定陶縣西南古
陶邱在焉堯始居於陶邱後爲唐侯故曰陶唐氏○漢書
地理志中山國唐縣堯山在南應劭曰故堯國也唐水在
西○塗按唐縣是堯所封地一統志云陶唐城在太原府
清源縣東南四十里

虞

虞都於蒲坂在今蒲州府治永濟縣○史記集解皇甫謐
曰舜所都或言蒲坂或言平陽或言潘今上谷也正義云
括地志云平陽今晉州城是也蒲坂今蒲州南二里河東
縣界蒲坂故城是也○塗按全氏祖望正皇甫謐云或言
潘潘當爲漢爾雅云漢大水尾下郭云今河東汾陰縣有
水口如車輪潰沸湧出其深無限名之曰漢

九夷

九夷今高麗地○說文南方蠻閩从虫北方狄从犬東方
貉从豸西方羌从羊此六種也西南夷人僬僂从人蓋在
坤地頗有順理之性惟東夷从大大人也夷俗仁仁者壽
有君子不死之國孔子曰道不行欲之九夷乘桴浮於海

有以也○爾雅云九夷八狄七戎六蠻謂之四海○漢書
地理志云東夷天性柔順異於三方之外故孔子悼道不
行設浮於海欲居九夷有以也夫樂浪海中有倭人分爲
百餘國以歲時來獻見云○皇侃義疏云四方東有九夷
一元菟二樂浪三高麗四滿飾五鳧更六索家七東屠八
倭人九天鄯南有八蠻一天竺二呿首三焦僂四跂踵五
穿胸六僂耳七狗軼八旁脊西有六戎一僂夷二依狔三
織皮四耆羌五鼻息六天剛北有五狄一月支二濊陌三
匈奴四單于五白屋也○劉原父七經小傳云九夷蓋在
徐州菑魯之間中國之夷非海外之夷也周末時戎夷與
中國雜居仲尼周流其羈旅之際適偶可居九夷耳非忿

懟中國莫能宗已而去之也○呂東萊大事記云史記李斯曰惠王用張儀之計南取漢中包九夷制鄢郢戰國策張儀曰楚破南陽九夷內沛許鄢陵危以此考之九夷之地略可見方孔子在陳蔡相去蓋不遠也○鹽按孔子自是乘桴之意不必以爲中國之夷

蔡

上蔡在今汝寧府上蔡縣西南十里新蔡在今汝寧府新蔡縣下蔡在今壽州北三十里○地里志汝南郡上蔡縣云故蔡國周武王弟叔度所封度放成王封其子胡十八世徙新蔡汝南郡新蔡縣云蔡平侯自蔡徙此後二世徙沛郡下蔡縣云故州來國爲楚所滅吳取之○遷蔡平侯

於此後四世侯齊竟爲楚所滅○路史國名紀黃帝後結
姓之分云靳春江中有蔡山在廣濟縣大龜納錫故曰蔡
非姬姓蔡○塗按今黃梅縣西南九十里有蔡山西接廣
濟縣杜注左傳以僂句爲地名而不詳其處然則出龜之
地當卽是蔡山也

滕

滕在今兗州府滕縣○左傳杜注滕國在沛國公邱縣東
南疏云譜云今沛郡公邱縣是也○彙纂云今兗州府滕
縣西南十五里有古滕城卽滕國也○金仁山曰赧王元
年孟子自齊歸鄒二年卽如宋與宋句踐戴不勝問答則
滕世子過宋而見孟子當在此時自滕而西南過宋三百

五十餘里○釋地曰自臨淄抵滕不滿五百里一往一還將千里公孫丑曰齊滕之路不爲近矣○顧氏棟高曰先王建國其小者不能五十里若邾滕邾薛近在一縣之地又曰滕縣爲滕薛邾三國滕城在縣西南十四里薛城在縣南四十里邾城在縣東六里又縣北爲邾絞邑又曰滕縣南十五里有濇河爲邾田襄十九年取邾田自濇水哀二年季孫斯伐邾取濇東田由是魯地兼涉滕縣之境又曰襄四年臧孫紇侵邾敗于狐臺哀二十七年越子使后庸來言邾田封于駘上卽此今狐駘山在兗州府滕縣東南二十里○金氏履祥曰是時楚地東得彭城而齊自濟鄆以南至薛則滕西南迫于楚東北迫于齊也

薛

薛在今兗州府滕縣南○杜注魯國薛縣○施氏彥士曰薛地入齊久矣通鑑綱目顯王四十八年齊號薛公田文爲孟嘗君孟子於赧王元年去齊二年之末自宋歸鄒而至於薛蓋在馮諼營窟之後孟嘗高枕之時矣或曰六國表顯王四十八年封田嬰於薛安知以金僇者非靖郭君耶曰此史記駁文不足憑也齊策靖郭君曰受薛于先王則嬰封于薛當自威王始而綱鑑于顯王末所書孟嘗君者爲得其實也初嬰將城薛因客海大魚之諫而止文見國策其後田文卒城之續漢書輿地志云薛河北有大城田文所築是也孟子過薛已當齊湣王時今滕縣南四十

里之薛城在故滕南少東二十六里○塗按薛任姓侯爵黃帝之後左傳奚仲遷于邳仲虺居薛大紀云武王封仲虺弟雍滑之後于薛地道記曰仲虺城在薛城西三十里按春秋薛侯來朝乃獻侯也後蓋爲齊威王所滅又春秋築臺于薛杜注魯地則魯別有名薛之地耳○路史國名紀雜國云淄州南四十里謂之大薛非滕南之薛

晉

晉國於大夏在今平陽府翼城縣○地理攷實曰成王封叔虞於唐始都于翼今平陽翼城縣是也昭侯封其叔父成師于曲沃今之聞喜縣也今之曲沃縣後魏所置非成師所封也至武公徙居絳在今絳州之北景公又徙新田

在今曲沃縣南晉復命新田爲絳故以絳爲故絳故絳在
今平陽府太平縣之南○括地志曰平陽卽晉州城西面
今平陽故城東面也城記曰堯築也又曰故唐城在絳州
翼城縣西二十里徐才宗國都城記云唐因帝堯之裔子
所封至周成王時唐人作亂成王滅之而封大叔更遷唐
人子孫於杜謂之杜伯又曰故唐城在并州晉陽縣北二
里國都城記云唐叔虞之子燮父徙居晉水傍今并理故
唐城○詩緝曰堯都有四地理志太原晉陽注云故詩唐
國晉水所出一也河東平陽注云堯都也在平河之陽二
也中山唐縣張晏注云堯爲唐侯國於此三也河東疵縣
順帝改曰永安臣瓚于晉陽下注云所謂唐今河東永安

是也去晉四百里四也詩之唐國其說有三詩譜以爲堯始居晉陽後乃遷平陽於詩唐國爲晉陽皇甫謐以堯始封於中山唐縣後徙晉陽及爲天子都平陽詩唐國爲平陽臣瓚又以唐國爲永安今考堯都雖有四而詩之唐國當從詩譜爲晉陽蓋成王封弟叔虞于堯之故墟曰唐侯其子燮以晉陽實晉水所出因改爲晉然則唐叔虞之始在晉陽矣唐以堯得名晉以水得名其地一也自叔虞始封于晉陽其後三世至成侯徙曲沃八世至穆侯自曲沃徙絳十世至昭侯自絳徙翼至桓叔孫武公并晉又自曲沃徙絳也○日知錄曰史記晉世家成王封叔虞于唐唐在河汾之東方百里翼城正在二水之東而晉陽在汾水

之西又不相合竊疑唐叔之封以至侯綰之滅並在于翼
所謂大夏者正今晉絳吉縣之間○查氏揆曰毛詩唐魏
並列明國非都也史記晉世家唐有亂周公誅滅唐成王
遂以封叔虞地理志亦云成王滅唐封弟叔虞既曰滅唐
則爲堯裔子之國而非堯之都明矣史記謂唐在河汾之
東方百里是也鄭氏因季札有陶唐遺風語追述唐堯舊
都并晉之世次與唐改爲晉之由初不以詩之唐爲太原
晉陽也而嚴氏詩緝謂唐國當從詩譜爲晉陽殊不知曲
沃絳翼之人之詩與晉陽何涉蓋拘守鄭義轉失其意指
矣究其舛謬不始嚴氏班史以成王滅唐屬晉陽之下其
誤一也括地志故唐城在并州晉陽縣北二里國都城記

變父徙居晉水傍按唐城卽變父初徙之處若叔虞始封在晉陽卽已在晉水之傍又何容徙其誤二也世紀帝堯始封中山唐縣後又徙晉陽按此當是爲唐侯時其後未嘗爲國成王何由滅之以封叔虞其誤三也太原大夏大鹵參墟夏虛所括遼遠杜預注多疏畧如宣汾洮障大澤以處太原注太原晉陽也汾固發源晉陽洮則非其水也水經注涑水所出俗謂之華谷至周陽與洮水合司馬彪曰洮水出聞喜縣故王莽以縣爲洮亭按聞喜縣卽曲沃然則汾洮之神專主晉陽乎是知傳之所言太原者固已兼有河東矣杜氏釋例以洮水闕不知所在於定四年命以唐誥而封於夏虛亦謂夏墟大夏今太原晉陽其誤四

也詩正義謂序名晉爲唐之意以其憂深思遠有陶唐之風故名之唐然則何以不近取平陽轉遠託太原晉陽乎其誤五也按竹書紀年周成王十年命唐叔虞爲唐侯康王九年唐遷於晉宣王十六年晉遷於絳唯無成侯徙曲沃事漢志聞喜故曲沃晉成侯自晉徙此詩譜據之是也蓋叔虞本封于唐其子燮父始徙晉陽爲晉侯至成侯徙曲沃穆侯又自曲沃徙于絳紀年於成侯徙曲沃闕文而漢志補正之不然穆侯始遷于絳而成侯則僖侯穆侯父祖使無曲沃之徙則蟋蟀之刺釐侯當在晉陽矣近徐位山竹書統箋以漢志爲誤非也有成侯之徙曲沃而自唐之晉自叔虞以至緡侯始末粲然矣而叔虞之始封臣瓚

謂永安括地志故唐城在絳州翼城縣西二十里卽堯裔
子所封史記翼晉君都邑也臣瓚所謂永安今之霍州春
秋亦屬絳耳絳卽故絳卽翼晉語宰孔曰景霍以爲城汾
河洑澮以爲淵蓋絳之形勢如此也水經注汾水過永安
縣又東厯唐城東又逕霍城又南經趙城西與臣瓚合括
地志所謂翼也揆又得一證定四年子魚曰分唐叔懷姓
九宗職官五正正義謂唐之餘民隱六年翼九宗五正頃
父之子嘉父逆晉侯於隨杜注翼晉舊都紀年王師滅唐
遷其民於杜據此則九宗五正係唐人未遷之族成王留
之以賜唐叔是世居於翼者可以證唐叔始封之卽在翼
矣○大事表曰晉所滅十八國又衛滅之邢秦滅之滑皆

歸于晉景公時翦滅衆狄盡收其前日蹂躪中原之地又東得衛之殷墟鄭之虎牢自西及東延袤二千餘里有山西全省又有直隸大名府之元城縣爲沙鹿山廣平府之邯鄲成安清河永年四縣順德府之邢臺任唐山三縣俱與衛接境真定府之晉州趙州冀州及藁城欒城柏鄉臨城四縣山東東昌府之恩縣冠縣曹州府之范縣與齊魯二國接境又河南懷慶府之濟源修武孟溫四縣衛輝府之汲縣淇縣輝縣濬縣新鄉縣南自解州平陸縣渡河有河南府之陝州閿鄉靈寶桃林之塞在焉永寧池偃師三縣後又得嵩縣陸渾地與周接境其西自蒲州永濟縣渡河有陝西同州府之朝邑韓城澄城白水四縣及華陰

縣又延安府爲晉河西上郡西安府之臨潼縣爲所滅驪戎地商州爲晉上雒及菟和倉野之地俱與秦接境後驪戎地入秦爲侯麗地○又曰晉地近王畿方周新東遷時列侯未甚兼併沈妣蓐黃實在太原虞虢焦滑霍楊韓魏列于四境晉於其中特彈丸黑子之地勢微甚而桓莊之時猶能命諸侯以討有罪曲沃之叛王命虢公伐曲沃至翼侯滅矣而虢仲芮伯荀侯賈伯同日興師庶幾方伯連帥之義安在江漢常武不可再觀哉而釐王貪其寶賂列爲諸侯肆其狂剽吞滅小國自武獻之世兼國多矣蓋天下之無王自晉始及勢旣強大乃復勤王以求諸侯周室之不亡復于晉重有賴焉自虢滅據殺函之固啟南陽扼

孟門太行之險南據虎牢北據邯鄲擅河內之殷墟連肥
鼓之勁地西入秦域東軼齊境天下扼塞鞏固之域無不
爲晉有然後以守則固以攻則勝擁衛天子鞭笞列國周
室藉以繇延者二百年是猶倒持太阿之柄而復假之以
自衛也然使晉不兼併諸國周亦無能聯絡形勢以自強
何則周行封建其勢散而晉併列國爲郡邑其勢聚封建
之不如郡縣自春秋之世不已較然哉

趙

趙氏食邑在今平陽府之河津縣後徙邯鄲在今廣平府
邯鄲縣○左傳賜趙夙耿杜注在平陽皮氏縣○張晏曰
邯山在東城下邯盡也城郭從邑故加邑○史記云周繆

王賜造父以趙城正義曰晉州趙城縣史記云賜趙夙耿
索隱云今河東皮氏縣耿鄉○括地志云今晉州趙城縣
是改魏縣地後改曰永安卽造父之邑也故耿城在絳州
龍門縣東南十二里故耿國也都城記云耿羸姓固皮氏
故城在絳州龍門縣西百三十步○地理志曰趙分晉得
趙國北有信都真定常山中山又得涿郡之高陽鄆州鄉
東有廣平鉅鹿清河河間又得勃海郡之東平舒中邑文
安束州成平章武河以北也南至浮水繁陽內黃斥丘西
有太原定襄雲中五原上黨本韓之別郡也遠韓近
趙後卒降趙○國策蘇秦曰當今之時山東之建國莫如
趙強趙地方三千里帶甲數十萬車千乘騎萬匹粟支十

年西有常山南有河漳東有清河北有燕國燕固弱國不足畏也且秦之所畏害於天下者莫如趙然而秦不敢舉兵甲而伐趙者畏韓魏之議其後也

魏

魏氏食邑在今解州芮城縣後徙大梁在今開封府治祥符縣○釋地云張儀說哀王曰梁南與楚境西與韓境北與趙境東與齊境梁之地勢固戰場也○括地志云魏故國在芮城縣北五里○一統志安邑故城在夏縣北帝王世紀禹都安邑春秋時魏絳自魏徙此戰國爲魏都史記魏武侯二年城安邑至惠王九年徙都大梁又云按元和志以安邑縣爲本夏舊都不知此後魏所分之南安邑也

孔安國書傳鳴條岡在安邑縣西今鳴條岡實在夏縣之
西安邑之北則故安邑在夏縣可知○趙氏佑曰孟子獨
稱梁不一言魏則是時必有因遷都而並改國號之事○
樊氏廷簡曰案詩譜魏國周以封同姓其地在古冀州雷
首之北析城之西南枕河曲北涉汾水大率不出河東之
界此始封魏之疆域魏策鮑彪注魏自高陵以東盡河東
河內南有陳留及汝南之召陵潁疆新汲西華長平潁川
中牟陽武酸棗卷此戰國魏之疆域也張儀說魏王曰魏
地四平諸侯四通條達輻湊無有名山大川之限從鄭至
梁不過百里從陳至梁二百餘里馬馳人趨不待倦而至
梁南與楚境西與韓境北與趙境東與齊境魏之地勢固

戰場也魏南與楚而不與齊則齊攻其東東與齊而不與
趙則趙攻其北不合於韓則韓攻其西不親於楚則楚攻
其南此所謂四分五裂之道也此言大梁形勢最詳悉閭
若璩曰魏之失計未有如都大梁之甚者也去河山之險
而就平衍四達之地棄文侯武侯兩代之霸迹而爲新造
之邦安邑旣去後五十四年遂獻安邑於秦未幾而秦兵
至大梁矣又未幾而秦圍大梁矣○塗按鮑彪注卽引漢
書地理志文○國策蘇秦曰大王之地東有鴻溝陳汝南
有許鄆昆陽邵陵武舞陽新鄴東有淮潁沂黃煮棗無繇
西有長城之界北有河外卷衍酸棗地方千里

韓

韓氏食邑在今蒲州府萬泉絳州河津縣境○地理攷實
曰晉滅韓曲沃并晉韓萬御戎復采韓原則韓原韓萬之
采邑蓋在山西平陽府河津萬泉之間韓氏復滅鄭徙都
河南○又曰韓城縣今屬陝西同州府地在河西本秦漢
之夏陽縣隋始析置韓城縣以古韓國爲名然十五年秦
晉戰韓原獲晉侯非此地也韓原當在河東文十年晉伐
秦取少梁韓賊地始入于晉耳○又曰左傳邲晉應韓杜
無注似以十五年之韓原爲古韓國括地志云同州韓城
縣南十八里爲古韓國說韓奕詩者同王肅則謂今涿郡
方城縣有韓侯城魏書地形志亦云范陽郡方城縣有韓
侯城方城今爲順天府之固安縣在府西南百二十里與

詩之王錫韓侯其追其貊奄受北國者正相符使韓國在關中豈役燕師爲之築城乎又何能奄受北國乎或又以梁山在韓城爲可據然燕地亦有梁山水經注鮑邱水過潞縣西高粱水注之首受繫水於戾陵堰堰水枝分東逕梁山南接潞縣今之通州其西有梁山固當固安縣之東北也禹治冀州水恒衛旣從則燕地之山固其所奠定者也近韓城有梁山名偶同耳○地理志潁川郡陽翟下云夏禹國周末韓景侯自新鄭徙此○方輿紀要曰哀侯滅鄭徙陽翟今開封府禹州治北有鞏洛成臯之固西有宜陽商阪之塞東有宛穰洧水南有陘山宜陽今河南府宜陽縣商坂卽商洛山在商州東南九十里宛在南陽穰在

鄧州洧水出禹州密縣境至陳州西華縣北入潁水陘山
在禹州新鄭縣南三十里○塗按景侯時鄭尙未滅當作
哀侯地理志誤○一統志韓城在固安縣東南水經注聖
水東南逕韓城東按舊說皆以韓國在同州韓城縣顧炎
武辨之曰水經注引王肅言方城有韓侯城今固安縣卽
漢之方城水經注又言濕水逕良鄉縣之北界厯梁山南
高粱水出焉是所謂奕奕梁山者矣曹氏曰武王子初封
於韓其時召襄公封於北燕實爲司空王命以燕衆城之
同州去韓二千里卽令召公爲司空掌邦土亦當發民於
近甸而已豈有役二千里外之人而爲築城者哉況其追
其貊乃東北之夷而蹶父之靡國不到亦似爲韓土在北

陸之遠也又考王符潛夫論曰昔周宣王時有韓侯其國
近燕漢時去古未遠當有傳授今以水經注爲定○地理
志曰韓分晉得南陽郡及潁川之父城定陵襄城潁陽潁
陰長社陽翟郟東接汝南西接宏農得新安宜陽皆韓分
也鄭國今河南之新鄭及成臯滎陽潁川之崇高陽城皆
鄭分也○國策蘇秦曰韓北有鞏洛成臯之固西有宜陽
常阪之塞東有宛穰洧水南有陘山地方千里○國策范
雎曰舉兵而攻滎陽則成臯之路不通北斬太行之道則
上黨之兵不下一舉而攻宜陽則其國斷而爲三